

Traversadas en suns e tuns – valisic e rumantsch s'inscuntran

■ (cp) **Traversadas en suns e tuns, in barat cultural valisic-rumantsch en pliras parts, fa l'entschatta a Cuira. Il punct culminant è in concert cun l'ensemble da musica da chombra valisic Ensemble Cymru, il Chor Rumantsch ed il kanti-chor chur. L'occurrenza a Cuira vegn purtada e preschentada da la Scola chantunala grischuna e da la Lia Rumantscha.**

Traversadas en suns e tuns è in barat cultural en pliras parts tranter il Grischun e la Valisa. L'entschatta fa Cuira. Gimnasiastas e gimnasiasts rumantschs da la Scola chantunala grischuna beneventan giasts da la Valisa per s'occupar da divers aspects dal valisic e dal rumantsch. Tgenins èn ils tratgs communabels, nua datti differenzas, tge pon ins forsà emprender in da l'auter, cura ch'i va per la dumonda co mantegnair e promover la lingua?

Sco punct culminant da l'inscunter a Cuira vegn represchentà il concert Traversadas en suns e tuns. L'ensemble da

musica da chombra Ensemble Cymru (direcziun *Peryn Clement-Evans*), il Chor Rumantsch (direcziun *Nesa Demarmels*) ed il kanti-chor chur (direcziun *Christian Klucker*) preschantan chanzuns e melodias che dattan perditga da la ritga tradiziun musicala da las duas cuminanzas linguisticas.

Concert cun suns e tuns tradiziunals

En in intermezzo discutan ils gimnasiasts cun ils commembers da l'Ensemble Cymru in pèr resultats da lur occupaziun cun las duas linguas. Il concert ha lieu mesemna, ils 6 d'avrigl 2016, a las 20.00 en l'aula Plessur da la Scola chantunala grischuna.

L'occurrenza a Cuira vegn purtada e preschentada da la Scola chantunala grischuna e da la Lia Rumantscha. Responsabels per ils accents musicals da l'entir project èn ils manaders artistics Christian Klucker e Peryn Clement-Evans.

Ulteriurs accents culturals e musicals

L'idea per in tal barat ha già Peryn Clement-Evans, il directur artistic da l'Ensemble Cymru, da chasa a Bangor al nord da la Valisa, durant in viadi da vacanzas che ha manà el er en il Grischun. L'intent principal è da render pli enconuscentas las duas linguas rumantsch e valisic e lur tradiziun culturala, da mussar perspectivas e dad accentuar la plivalur ch'ellas portan a lur pledadras e pledaders.

Il barat cuntinuescha l'atun da quest onn cun accents musicals. L'entschatta october visita il chor da giuvenils Còr Siambri Canolfan Gerdd William Mathias tranter auter la chapitala grischuna ed in pau pli tard va l'ensemble vocal incantanti en la Valisa per dar in concert.

Traversadas en suns e tuns, concert ils 6 d'avrigl 2016, a las 20.00 Aula Plessur da la Scola chantunala grischuna entrada: 20.- / 10.-.



Il Chor Rumantsch ed il kanti-chor chur (foto) vegnan a sa participar al barat cultural tranter valisic e rumantscha.